

六典通考



六興圖考



六典通考卷一百十一

湖西閣鎮珩輯

禮制考

嘉禮通論

大宗伯以嘉禮親萬民

嘉善也嘉禮之別有六

以飲食之禮親宗族兄

弟

親者使之相親人君有食宗族飲酒之禮所以親之也

禮記大傳上治祖禰尊尊

也下治子孫親親也旁治昆弟合族以飲序以昭繆別之以

禮義人道竭矣

治猶正也繆讀為穆

同姓從宗合族屬異姓主名治際

會

合謂合之宗子之家序昭穆也異姓謂來嫁者也主於母與婦之名耳際會昏姻交接之會也

繫之以姓

而弗別綴之以食而弗殊君有合族之道族人不得以其戚

戚君位也

王居明堂禮季冬命國為酒以合三族

魯語

公父文伯之母祭悼子康子與焉胙不受徹俎不宴宗不具

不繹繹不盡飫則退

立曰飫坐曰燕言宗具則與繹繹畢而飲不盡飫禮而退

公父文伯

之母欲室文伯饗其宗老請守龜卜室之族師亥聞之曰善

哉男女之饗不及宗臣宗室之謀不過宗人也

此宗人即宗臣也亦用同姓若

漢宗正用諸劉矣

右飲食禮

禮書族食之禮合之以時等之以世掌之以

膳夫其薦也以飭蒸其飲也或以夜序以昭穆別以禮義

然後孝慈友恭油然而生於其間蓋合族以食恩也昭穆禮

義所以節恩者也無恩則離恩而無以節之則亂先王於

宗族使不至離且亂而已

以昏冠之禮親成男女

親其恩成其性

以賓射之禮親故舊朋友以

饗燕之禮親四方之賓客以脰臠之禮親兄弟之國

脰臠社稷宗廟

之肉以賜同姓之國同福祿也

大行人歸脰以交諸侯之福

交或往或來者也

魯僖公九年夏會于葵邱王使宰孔賜齊侯胙

胙祭肉尊之比二王後

曰天子有事于文武

有祭事也

使孔賜伯舅胙

宋成公如楚還

入于鄭鄭伯將享之問禮于皇武子對曰宋先代之後也于

周爲客天子有事臠焉

有事祭宗廟也臠祭肉尊之故賜以祭胙

定公十四年

天王使石尙來歸脰

脰祭社之肉盛以蜃器以賜同姓諸侯

公羊傳石尙者天

子之士也脰者何俎實也腥曰脰熟曰臠

禮諸侯朝天子助祭于宗廟然後受

俎實時魯不助祭而歸之故書以譏之

穀梁傳脰者何也俎實也祭肉也生曰

脰熟曰臠其辭石尙士也何以知其士也天子之大夫不名

石尙欲書春秋諫曰久矣周之不行禮於魯也請行脰貴復

正也賈公彥曰左傳劉康公成肅公會晉侯伐秦成子受脰
曰祀有執脰戎有受脰注云脰宜社之肉也盛以蜃器故曰脰劉子
社稷之肉曰脰而公羊穀梁皆云生居俎上曰脰熟居俎上
曰脰非鄭義耳

以賀慶之禮親異姓之國異姓王昏姻甥舅大行人賀慶以贊諸

侯之喜贊助也小行人若國有福事則令慶賀之宋眞宗

景德二年太常博士周漸閣門祇候郭盛爲契丹國生辰使
職方郎中直昭文館韓國華衣庫副使焦守節爲契丹國母
正旦使秘書丞張若谷內殿崇班郭允恭爲國主正旦使自
是歲以爲常遼史禮志宋使賀生辰正旦至日臣僚昧爽
入朝使者至幕次臣僚班齊皇太后御殿坐宣徽使押殿前
班起居畢捲班次契丹臣僚班起居畢引應坐臣僚上殿就

位立餘臣僚不應坐者退於東面侍立漢人臣僚東洞門入面西鞠躬舍人鞠躬通某以下起居凡七拜畢贊各祇候引應坐臣僚上殿就位立中書令大王西階上殿奏宋使并從人膀子訖就位立其餘臣僚不應坐者退于西面侍立次引宋使副六人于東洞門入丹墀內面殿齊立閣使自東階下受書匣使人捧書匣者皆跪閣使搢笏立受書匣自東階上殿欄內鞠躬奏封全訖授樞密開封宰臣對皇太后讀訖引使副六人東階上殿欄內立使者揖生辰節大使少前使者俛伏跪附起居訖起復位立次引賀皇太后正旦大使附起居如前儀皇太后宣問南朝皇帝聖躬萬福舍人揖生辰大使并皇太后正旦大使少前皆跪唯生辰大使奏來時聖躬

萬福皆俛伏興引東皆下殿丹墀內面殿齊立引進使引禮物于西洞門入殿前置擔牀控鶴官起居四拜擔牀于東便門出畢揖使副退于東方西面皆鞠躬舍人鞠躬通南朝國信使某官某以下祇候見舞蹈五拜畢不出班奏聖躬萬福再拜揖班首出班謝面天顏訖復位舞蹈五拜畢贊各上殿祇候引各使副西階上殿就位句從人兩洞門入面殿鞠躬通名贊拜起居四拜畢贊各祇候分班引兩洞門出若宣問使副跋涉不易引西階下殿丹墀內舞蹈五拜畢贊各上殿祇候引西階上殿就位立契丹舍人漢人閣使齊贊拜應坐臣僚并使副皆拜稱萬歲贊各就坐行湯行茶供過人出殿門揖臣僚并使副起鞠躬契丹舍人漢人閣使齊贊皆拜稱

萬歲贊各祇候先引宋使副西階下殿西洞門出次揖臣僚
出畢報閤門無事皇太后起 宋使見皇帝儀宋使賀生辰
正旦至日臣僚味爽入朝使者至幕次奏班齊聲警皇帝升
殿坐宣徽使押殿前班起居畢捲班出契丹臣僚班起居畢
引應坐臣僚上殿就位立其餘臣僚不應坐者並退于北面
侍立次引漢人臣僚北洞門入面殿鞠躬舍人鞠躬通某官
某以下起居皆七拜畢引應坐臣僚上殿就位立引首相南
皆上殿奏宋使并從人膀子就位立臣僚並退於南面侍立
教坊入起居畢引南使副北洞門入丹墀內面殿立閤使北
階下殿受書匣使人捧書匣者跪閤使搢笏立受于北階上
殿欄內鞠躬奏封全訖授樞密開封宰相對皇帝讀訖舍人

引使副北階上殿欄內立揖生辰大使少前俛伏跪附起居
俛伏興復位立大使俛伏跪奏訖俛伏興退引北階下殿揖
使副北方南面鞠躬舍人鞠躬通南朝國信使某官某以下
祇候見起居七拜畢揖班首出班謝面天顏舞蹈五拜畢出
班謝遠接御筵撫問湯藥舞蹈五拜畢贊各祇候引出歸幕
次閣使傳宣賜對衣金帶句從人以下入見舍人贊班首姓
名以下再拜不出班奏聖躬萬福贊再拜稱萬歲贊各祇候
引出舍人傳宣賜衣使副並從人服賜衣畢舍人引使副入
丹墀內面殿鞠躬舍人贊謝恩拜舞蹈五拜畢贊上殿祇候
引使副南階上殿就位立句從人入贊謝恩拜稱萬歲贊有
敕賜宴再拜稱萬歲贊各祇候承受官引北廊下立御床入

大臣進酒皇帝飲酒契丹舍人漢人閣使齊贊拜應坐并侍立臣僚皆拜稱萬歲贊各祇候卒飲贊拜應坐臣僚皆拜稱萬歲贊各就坐行酒親王使相使副共樂曲若宣令飲盡並起立飲訖放盞就位謝贊拜並隨拜稱萬歲贊各就坐次行方茵地坐臣僚等官酒若宣令飲盡贊謝如初殿上酒一行畢贊廊下從人拜稱萬歲贊各就坐若傳宣令飲盡並拜稱萬歲贊各就坐殿上酒三行行茶行殺行膳酒五行候曲終揖廊下從人起贊拜稱萬歲贊各祇候引出曲破臣僚并使副並起鞠躬贊拜應坐臣僚并使副皆拜稱萬歲贊各祇候引使副南階下殿丹墀內舞蹈五拜畢贊各祇候引出次引眾臣僚下殿出畢報閤門無事皇帝起聲蹕

冠昏通論

黨正凡其黨之昏冠教其禮事掌其禁戒 文王世子五廟

之孫祖廟未毀雖爲庶人冠取妻必告告于君也 穀梁傳男子

二十而冠冠而列丈夫三十而娶女子十五而許嫁二十而

嫁譙周曰國不可久無儲貳故天子諸侯十五而冠十五而娶娶必先冠以夫妻王教之本不可以童子之道治之禮

十五爲成童以次成人欲人君之早有繼體故因之以爲節書稱成王十五而冠著在金縢周禮媒氏曰令男三十而娶

女二十而嫁故男自二十及三十女自十五及二十皆得嫁娶先是則速後是則晚故舜三十無室書稱曰鰥周禮女子

年二十未有嫁者仲春之月奔者不禁又禮爲夫之姊妹服長殤年十九至十六如此男不必三十而娶女不必二十而

嫁明矣 家語魯哀公問于孔子曰禮男必三十而有室女必

二十而有夫也豈不晚哉孔子曰夫禮言其極也不是過也

男子二十而冠有爲人父之端女子十五許嫁有適人之道

於此而往則自昏矣羣生閉藏乎陰以爲化育之始

陰冬也萬物翕

聚於冬爲發育之始

孔叢子子張問曰禮丈夫三十而有室昔者舜

三十徵庸而書云有鰥在下曰虞舜何謂也孔子曰夫男二十而冠冠而後娶古今通義也舜父頑母嚚莫克圖室家之端焉故逮三十而謂之鰥也詩云娶妻如之何必告父母父母在則宜圖昏若已沒則已之娶必告其廟今舜之鰥乃父母之頑嚚也雖堯爲天子其如舜何白虎通陽小成於陰大成於陽故二十而冠三十而娶陰小成於陽大成於陰故十五而笄二十而嫁也男三十筋骨堅強任爲人父女二十肌膚充盛任爲人母合爲五十應大衍之數生萬物也故禮內則曰男三十壯有室女二十壯而嫁

右冠昏年 通典五經異義曰左氏說歲星十二年一周
天故人君于十二可冠自夏殷天子皆十二而冠譙周云
武王崩成王年十三周公冠成王命史作祝辭告是除喪
冠也成王冠弁開金滕之書時十六矣是成王十五周公
冠之許慎以爲成王年十四是喪冠者恐失矣案禮傳天
子之年近則十二遠則十五必冠矣 太古男五十而娶
女三十而嫁中古男三十而室女二十而嫁堯舉舜曰有
鰥在人間以二女妻之周文王十五生武王地官媒氏掌
萬民之判令男三十而娶女二十而嫁有故則二十三而
嫁曲禮曰男子三十曰壯有室越王句踐使男二十而娶
女十七而嫁鄭元據周禮春秋穀梁逸禮本命等篇男必

三十而娶女必二十乃嫁王肅據孔子家語服經等以爲
男十六可以娶女十四可以嫁三十二言其極耳今案
三十二而嫁娶者眾庶之禮也服經爲夫婦之長殤士
大夫之禮也左傳十五而生子國君之禮也則卿士大夫
之子十五六之後皆可嫁娶矣

夏小正二月綏多女士綏安也冠子娶婦之時也 家語霜

降而婦功成嫁娶者行焉

詩云將子無怒秋以爲期

冰泮而農桑起昏禮

始殺於此

泮解也正月農事起蠶者采桑昏禮始殺至二月農事已起乃會男女之無夫家者期盡此月故也

詩云士如歸妻迨冰未泮

男子者任天道而長萬物者也

男乾道也

晉太常

王彪之議禮醮辭曰令月吉日以歲之正以月之令今案魯

襄公冠以冬漢惠帝冠以三月明無定月而後漢以來帝加

元服咸以正月及咸甯二年秋閏九月遣使冠汝南王柬此則非必歲首又議新年至尊當加元服今若依成帝故事用三元日者冠有金石之樂恐修山陵未畢於樂便闕禮冠白卜日又云夏葛屨冬皮屨無定時不必三元也案晉故事及兩漢皆非三元當任時事之宜耳

冠無定時月春夏不可使用秋冬

束皙

議春秋二百四十年魯女出嫁夫人來歸大夫迎女天王娶后自正月至十二月悉不以得時失時爲褒貶何限於仲春季秋以相非哉若昏姻季秋期盡仲春則隱二年冬十月夏之八月未及季秋伯姬歸於紀周之季春夏之正月也桓九年春季姜歸於京師莊二十五年六月夏之四月也已過仲春伯姬歸於紀或出盛時之前或在期盡之後而經無貶文

三傳不議何哉凡詩之興取義繁廣或舉譬類或稱所見人
不必皆可以定時候也又案桃夭篇敍美昏姻以時蓋謂盛
壯之時而非日月之時故灼灼其華喻以盛壯非謂嫁娶當
用桃夭之月其次章云其葉蓁蓁有蕢其實之子于歸此豈
在仲春之月乎又標有梅三章注曰夏之向晚迨冰未泮正
月以前草蟲嚶嚶末秋之時或言嫁娶或美男女及時然詠
各異矣周禮以仲春會男女之無夫家者蓋一切相配合之
時而非常人之節曲禮曰男女非有行媒不相知名故日月
以告君齋戒以告鬼神若常人必在仲春則其日月有常不
得前卻何復日月以告君乎夫冠昏笄嫁男女之節冠以二
十爲限而無春秋之期笄以嫁而設不以日月爲斷何獨嫁